

# PATENT OCHSNER

TRYBGUET 2003

## TRYBGUET

| Huber |

die nacht überchunnt scho wieder roseroti ränder | franset uus & fädlet die nächschi wuchen y | mir hei nid pennet, aber si wäg däm no lang nid wach | & zyt geit tic-tac-tic-tac viel z schnäu verby, we mir zäme si | i bi wie nes trybguet trybe, haus über chopf i dr schtrömig | wyt äwäg vom ufer & vor auem wyt äwäg vo dir | ewigi ebbe & fluet, im schturm isch jede hafe guet | aber dyne isch dä, won i scho ha vermisst, won no nüt vo dir ha gwüsst | du chasch cho & du chasch gah | du chasch aues vo mir ha | du chasch di uf mi verla | i bi immer für di da -ei tag länger aus für immer | schryss mi über ds näscht ab | führe mi hinger ds liecht | mir isch jedes mittu rächt | mach mi figefertig & sug mi uus | i leischte dir ke widersch-tand | i la mir aus vo dir la gfaue | schteue nume ei bedingig im voruus | la dä mäntigmorge nid zu üs i ds huus! | du chasch cho & du chasch gah | du chasch aues vo mir ha | du chasch di uf mi verla | i bi immer für di da -ei tag länger aus für immer | i liebe se meh aus mi - ei tag länger aus für immer!

## SCHLANGENÄSCHT

| Huber |

i däm schlangenäscht hani gschlafe | mit myne schwindsüchtige bue-betröim | chrut & chabis, hyäne & geier | shtouperdräht us seemanns-garn | i däm luftschtoss vou mit fautsche fründe | a däm tisch vor lääre töpf | schwarzpeter oder pokerschpiu | verschteckle oder blindi chueh | & dr zwyfu wirft e länge schatte | füut my brunne mit gift | wär cha läcke cha o bysse | & blaiu ouge wärde trüeb | machet dir doch öie shit - I mache myne | a däm chaute ofe bini ghocket | mit myne magersüchtige buebetröim | schutt & äsche, schrott & schärbe | läär-guet & autpapier uf dere chrützig hani gwartet | mit ere fauma-sche im närvegwand | mitässer, metzger, muurer & mäucher | göh so schnäu wie sie si cho | & dr zwyfu wirft e länge schatte | füut my brunne mit gift | wär cha läcke cha o bysse | & blaiu ouge wärde trüeb | machet dir doch öie shit - I mache myne | uf am drache bini gritte mit eire narbe meh | us eme guldfisch cha me guet e suppe mache | aber angersume funktioniert es nid | & dr zwyfu wirft e länge schatte | füllt my brunne mit gift wär cha läcke cha o bysse | & blaiu ouge wärde trüeb | machet dir doch öie shit - I mache myne

## BRANDSCHTIFTER

| Huber |

chumm mir zünzte hüt üsi wohnig a | eifach so zum luege wie sie brönnt | mir zwöi si jitz scho gnue lang da | s git nüt z verlüüre wo me nümme gwinne chönnt | chumm mir zünzte hüt üsi wohnig a | & au das wo üs im wäg schteit o | s paar sache würd i ganz gärn z grund gseh gah | & dr fūrwehrrmaa bruucht gar nid z cho | besser viu z schpät aus gar nie schnyde mir üs dr fluchtwäg ab | we mir jitz nid göh si mir morn no hie & schuflen üs üses grab | us dere bouschteu wird es fröidehuus | us em schnee vo geschter e fluss | & glychschtrom wird wächsuschtrom | die wyti wäut wartet voruss | d gruebe wird e garte | us dere knack-nuss wachst e boum | & dä boum treit honigsüessi frucht | dert isch scho wieder dr wurm drin | chumm mir zünzte hüt üsi wohnig a | nüt putzt besser aus es fūr | au rede vo «lifestyle» & das won i drunger verschtah | isch e notusgang oder en ouvertür | besser viu z schpät aus gar nie schnyde mir üs dr fluchtwäg ab | we mir jitz nid göh si mir morn no hie & schuflen üs üses grab | us dere bouschteu wird es fröidehuus | us em schnee vo geschter e fluss | & glychschtrom wird wächsuschtrom | die wyti wäut wartet voruss | d gruebe wird e garte | us dere knacknuss wachst e boum | & dä boum treit honigsüessi frucht | dert isch scho wieder dr wurm drin!

## PIMPERMEZZO

| Huber | Steiner |

## ZIMMER

| Huber | Brantschen |

wo mir früeh am morge si aacho | hei mir üs es biuigs zimmer gno | wo me vom fänschter uus | de schiff hätt chönne winke | we me hätt wöue | d wänd hei blaiu tapete gha | mit guldgäube lilie & überem bett | es bild vom garibaldi wonis zuegluegt het | & nes chruzifix | lislil het me d heizig ghöre surre | oder tube wo vor em fänschter gurte | mau e hung, mau es näbuhorn | schritte & schtimme vom gang här | oder vo duss | dr teppich isch rot gsi & het persisch ta | dr chronlüchter wo ne waggu het gha | & im egge e schtuehl, e tisch, druff e vase | mit blueme us plastig | I gloube, das & dr bahnhof & süsch nid viu meh hei mir zwöi i dere wuche vo venedig gseh

## NOVÄMBER

| Huber |

I loufe in e hammer | jedi zechprellerei flügt nadisna uf | dr novämber sugt mir mys rüggemarch us | ds blatt het sech gwändet | & richtet sich gäge mi | myni schattesyte mueten I dir nid zue | die hesch du nid verdient | I touche unger - säg wartisch uf mi? | & im mai bini wieder bi dir | ha zersch mys härz verlore | & schpeter my chopf | & jitz ou no mys gsicht | dr wind wäit vom norde & git mir dr räscht | vo au däm woni grosszügig ha überluegt | myni schattesyte mueten I dir nid zue | die hesch du nid verdient | I touche unger - säg wartisch uf mi? | & im mai bini wieder bi dir



# PATENT OCHSNER

TRYBGUET 2003

## UMLOUFBAHN

| Huber |

über ihre kreise d geier | i auer rysfäudrueh | da braut sech irgendöppis zäme | wo am schluss när niemer het gseh cho | sie trät dert uf ihrer umloubahn | oder i däm änge schnäggelech | schüttet vom hohle i ds lääre | & maut sech ds meischte uus | ihres hätz het se im schtich gla | het sech scho lang us em schtoub gmacht | & sy name treit sie für immer unger ihrer huut | sie seit: I bi uf myre umloubahn & sammle schick-salsschleg | alptröim, abschtürz & missglückti plän | faugruebe & fautschi fährt, | scham & zwyu, wuet & truur | bluet & träne, sorge & leid | das aues blybt eim treu, dr räscht vergeit! | aber säg, wär het scho aus im griff? | d insle gsehn I säuber – zeig mir ds schiff! | d tage si ne rosskur & so si ihri nächt | da hanget schtändig öppis düre | sie het meh aus eis ysen im füür | wo sie sech d finger dran verbrönn | & die süesse frucht die hange | immer z überscht i dr chrone | & blöderwys o no ging a de dünnschte äscht | sie seit: I bi uf myre umloubahn & sammle schicksalsschleg | alptröim, abschtürz & missglückti plän | faugruebe & fautschi fährt, | scham & zwyfu, wuet & truur | bluet & träne, sorge & leid | das aues blybt eim treu, dr räscht vergeit! | aber säg, wär hetscho aus im griff? | d insle gsehn I säuber – zeig mir ds schiff! | sie löscht ds liecht im gang & leit sech i ds bad & wartet dert mit offne arme...

## KE SCHTÄRN

| Traditionell |

d lüt sägen I heigi ke schtärn | & I heigi dr wy e so gärn | & I sig es rächts lueder | zum suufen e brueder | & das scho so lang | ja, I liebe den müssiggang | liebs schätzli wenn söu I dir cho | am sunntig z nacht oder dervor | & bi dir nid z wider | so leisch di nid nider | blyb uuf & wach | I chume grad aafangs dr nacht | & z überscht am bärg schteit es houz | & drei prügel so grad & so schtouz | ja dert hangt dr schwarz köhler | wenn är schtieng wär's ihm wöhler | & sie weis ou so ha | ja ou mir schtieng dr gauge wohl a | & hätt I e guldige bärg | & dä wäri viel tuusig maa wärt | ja dä tät I dir schänke | müesstisch nümm a mi danke | & mir schänk I y | ja I liebe den schnaps & den wy

## WEISCHWINIMEINE

| Huber |

wie geits, wie schteits? | mou merci, es muess, mir wei nid chlage | I meine, gäu was wosch? | me het ja o nid d weli | ja nu guet, äbe gäu | item, we me dänkt | im ändeffect, was söus? | weischwinimeine? | ja henusode, gäu, es chunnt wies muess | & chly schpatzig het me ging | & das isch sträng gseh ja würklech o nid nüt | I meine, eine derna dä würd jitz villech chlage | guet, à la bonöör, sigs haut eso | aber äbe, gäu, was wosch? | weischwinimeine? | es geit mau so & mau so | mau ufe & mau abe, mau füre & mau zrugg | es isch nid dr red wärt, was söu me da no säge? | es isch gäng wie gäng | es chöme de scho öppe wieder angeri zyte | I meine, gäu, du weisch ja wies isch | auso de, merci gäu! | mach nümm z lang | & seisch e gruess deheim | & bis es angers mau | irgendwie gseht me sech de scho | I meine, d wäut isch ja chly | nume no schnäu, wäge vori, I has de nid so gmeint | aber äbe, gäu, was wosch? | me seit ja no viu dr lieb läng tag | weischwinimeine?

## PARANOID

| Huber |

längi gradi & rähti winkle | ja mau ja git nei | du flüchtisch vor em bock & triffsch dr bär | vordänker mit hingergedanke | zyt isch gäut & reini närvesach | so guet wie au schtöh schnäuer aus du loufsch | betablocker & abfühermittu | uusverchouf, brot & spiu | wär d finger überau drin het macht nümm d fuuscht | & nume wü du nid paranoïd bisch | heisst das no lang nid | dass sie nid hinger dir hätz si

## COMPANERO

| Huber |

mir si I dr schtosszyt zäme dür ds chrüzfüür | roubritterglych | die gägen üs & mir gäg aus | hei geisseneier gsuecht | toujours überlade uf hu-uchdünnem ys | mit formel-1-rennfahrergaugehumor | mir hei ging e schweubrand umetreit | & bruchschstück vom nüt | vou hohn & schpott für au dä | haarschpauterdünnbrättbohrerchlychram | vo chatzbugg-lige chummerbuebe | mit ihrne hasehätz schtändig im chräbsgang | hey, compaño sentimental | I wär nid dä woni hüt bi | we du denn nid drby wärsch gsi | compaño sentimental | schad geit aus so schnäu verby | & geit wyter ohni di | mir hei ygschteckt & hei usteilt | prysboxerglych | mit fasch aune wasser gwäsche | näb de schueh im schiuf | si vo dr mördermittagshitz | fadegrad i die gmässigti zone | hey, compaño sentimental | I wär nid dä woni hüt bi | we du denn nid drby wärsch gsi | compaño sentimental | schad geit aus so schnäu verby | & geit wyter ohni di | me cha zwar män-gem chünig diene | aber dienet schliesslech keim | biedermeiereinheitsmief | & mir hei dene afa glyche | wo mir nie hei wöue sy – nume bire wärde so ryf | die chifertäferchutte ziehn I gschider wieder ab & gibe mir e blöss | hole mys auerliebschte fyndbiud | nomau us em chäuer | putzes bis es wieder so glänzt wie denn | & nagle mir das schöne schtück vor a myni schtirne | hey, compaño sentimental | I wär nid dä woni hüt bi | we du denn nid drby wärsch gsi | compaño sentimental | schad geit aus so schnäu verby – & geit wyter ohni di

## SCHNUPPE

| Huber |

die guete & die grächte | lige längschtens scho | i ihrne bett & touche dür ne töifschlaf | ds buffet isch es schlachtfäud | schtinkt wie ne fisch | es wär würklech es wunder we morn | no öpper am läbe isch | ha ds muu villech e chly vou gno | i ha wyt müesse gah für dir nöcher z cho | & ha dyni abgründ vor ouge gha | leider ersch won i gheit bi | i ha vori e schtärnschnuppe gseh | am himu über mir | ha zwar derby a di dänkt | aber gwünscht - gwünscht han i mir nüt | a däm bild won i mir vo dir ha gmacht | han i baschtlet, putzt & poliert | ha di vermisst & wo du när ändlech da bisch gsi | hätt i di lieber wieder vermisst | wenn i einisch meh sött e schtärnschnuppe gseh | am himu über mir | hätt das won i mir würdi wünsche | nüt meh z tüe mit dir

